

# Nua va il Commonwealth?


Promover ils dretgs umans u taschair

DA GUIU SOBIELA-CAANITZ

■ **L'insla da Trinidad en las Antillas, sper la riva da Venezuela, cun passa 1 milliun olmas, ha beneventà ils 27 e 28 da november personalitads da quels 53 stadis che fan part dal Commonwealth e cumpiglian 2 miliardas umans.** Sin l'insla discurr'ins chinais, englais, franzos «créole», hindi e spagnol, ma l'englais è l'unic linguatg da l'organiziun, pia era da ses inscunter suprem. Ins ha beneventà l'adesiun d'ina candidata africana, la Ruanda (strusch 10 milliuns olmas). Ma dus rapports davart il futur dal Commonwealth han segir fatschentà las delegaziuns.

## Dapi 1931

L'istoriografia britannica numna «Commonwealth» ils onns da dictatura englaisa da 1649–1660. Il Commonwealth d'oz perencunter è naschì d'ina decolonisaziun. 1921 ha la Gronda Bretagna reconuschì l'indipendenza da Canada, l'Irlanda, l'Africa dal sid, l'Australia e la Nova Zelanda. Tuttas, tenor il «Statut da Westminster» (1931), eran «freely associated as members of the British Commonwealth of Nations» e reconuschevan il retg britannic sco chef da lur stadi; mo l'Irlanda ha renunzià 1948 a la commemoranza. 1947 èn l'India ed il Pachistan vegnids independents aifer il Commonwealth; l'India è oz il principal stadi member cun passa 1 milliarda olmas. Las bleras anteriuras colonias britannicas, sco la Malaysia (passa 26 milliuns olmas) han sa sviluppadas sumegliantamain; il Commonwealth ha renunzià daditg a sa numnar «British», tant



Il Commonwealth cumpiglia 53 stadis cun 2 miliardass umans.

pli che blers stadis commembers èn republicas cun in agen president. Dapi 1995 ha il Commonwealth in commember che n'è mai stà colonia britannica e nua ch'ins na discorra betg englais; igl è il Moçambique (passa 21 milliuns olmas). In motiv è segir che tschintg dals sis pajais limitrofs da Moçambique fan part dal Commonwealth. In segund liom tranter tut lezs pajais è il suahili, linguatg cuminaivel da l'Africa dal sidost derasà sur las linguas localas. En quel vast intschess prevala pia la bilinguitad; tiers vegn savens, sco terz, l'anterior linguatg colonial, il pli savens englais, en Moçam-

bique il portugais, en ils pajais antruras beltgs il franzos. Quest dominescha tradiziunalmain en la vita internaziunala da Ruanda; ma lezza inculpescha la Frantscha da participaziun al genocid da 1994 (var 800 000 unfrendas) ed ha rututtas relaziuns diplomaticas cun Paris. Quai declera la candidatura da Ruanda ad ina commemoranza en il Commonwealth, tant pli che lez pajais è limitrof da duas commembras, la Tanzania e l'Uganda (respectivamain 40 e 30 milliuns olmas). A medem temp ha la Ruanda, oramai rinforzada, normalisà relaziuns diplomaticas cun Paris;

quai conferma il pais global dal Commonwealth.

## Ierta e pussaivladads

«In'uniun libra da naziuns independentas, pli baud dependentas da la regenza imperiala britannica, che mantegnan lioms amicabels e pratics cun la Gronda Bretagna» (1). In lexicon englais da 1995 definescha uschia il Commonwealth. Il magazin «The Economist» (Londra) dals 28 da november dat ina definiziun pli critica: «In club che sa schlargia da cuntin ed unescha anteriuras colonias, il pli savens britannicas» (p. 67). L'artitgel resumescha ils rap-

ports davart il futur dal Commonwealth: «Domadus manegian che la grupp stuess promover ils dretgs umans e la democrazia a moda pli aggressiva; uschiglio pudess'la gist taschair». Ins spetga cunzunt che l'India vegnia pli activa en lez regard; il rapport punctuescha che dus terzs da sia populaziun e da quella da Malaysia mettian pais sin la commemoranza da lur pajais. I para pia ch'il Commonwealth haja sa verifitgà sco ierta positiva dal colonialissem britannic, ma ch'el possia e duaja far dapli. A Trinidad ha l'occupà cun il nivel global da la mar; lez va ensi pervi dal stgaurament climatic, smanatschond bleras inslas pitschnas e planivas, commembras dal Commonwealth, en la Mar dal sid. In cas extrem è il Tuvalu (26 km<sup>2</sup>, 11 000 olmas), ad ost da la Papua Nova Guinea: «La muntada da la mar periclitescha già ussa ses reservuars d'aua dultscha, sco era l'economia da subsistenza damanaivel da la riva (...). Il Tuvalu consista da nov inslas che n'èn nagliur pli ladas che 400 m e sa dauzan sur il mar ad ina media da 1,5 m» (2). Ma era la Papua Nova Guinea (6,3 milliuns olmas) è smanatschada; lezza arranscha ussa la translocaziun dals 3300 umans da sis inslas da curals che duain sfundrar al pli tard en quindesch onns. A Trinidad ha il Commonwealth discutà la finanziaziun da mesiras encunter il stgaurament climatic, cunzunt a favur da las naziuns las pli paucas.

1) David Crystal (ed.), *The Cambridge Encyclopedia. Segunda ediziun. Cambridge (University Press, ISBN 0-521-44429-2 [hc]) 1995, p. 276, chavazzin «Commonwealth, (British)».*  
2) *Der Fischer Weltalmanach 2009, Minca (Fischer Taschenbuch Verlag, ISBN 978-3-596-72009-5) 2008, p. 482, chavazzin «Tuvalu».*